



سوروهنجاي قرساغيغن برونبي دارالسلام  
COMPETITION COMMISSION  
BRUNEI DARUSSALAM

## SIARAN MEDIA SURUHANJAYA PERSAINGAN BRUNEI DARUSSALAM

### OECD memuji perkembangan yang dikecapi oleh CCBD

---

Tarikh: 4 Januari 2021

1. Usaha dan perkembangan Suruhanjaya Persaingan Brunei Darussalam (*Competition Commission Brunei Darussalam – CCBD*) dalam melaksanakan Perintah Persaingan mendapat pujian dari pihak *Organisation for Economic Cooperation and Development* (OECD) semasa bengkel atas talian bertajuk “*Competition Workshop for Younger Competition Agencies – First Steps*” yang telah diadakan pada bulan lepas. Perkembangan pelaksanaan Perintah Persaingan di Negara Brunei Darussalam termasuk penguatkuasaan larangan Perjanjian Anti-Persaingan, pembangunan rangka perundangan yang efektif dan usaha pemberigaan, telah dikongsikan oleh Pengerusi Suruhanjaya Persaingan Brunei Darussalam, Yang Berhormat Nik Hafimi binti Abdul Haadii di dalam ucaptama beliau.
2. Bengkel atas talian selama sehari dianjurkan bersama oleh CCBD dan OECD, *Korea Policy Centre* (KPC) di bawah Program Persaingan OECD/KPC. Bengkel disasarkan kepada agensi-agensi persaingan muda di rantau ASEAN dengan tujuan untuk memberi ruang bagi perkongsian pengetahuan dan pengalaman mengenai langkah-langkah permulaan yang diperlukan untuk melaksanakan dan menguatkuasakan perundangan persaingan. Seramai lebih daripada 20 orang pegawai dari agensi-agensi persaingan muda di rantau ASEAN termasuk CCBD; *Myanmar Competition Commission*; *Lao Business Competition Commission*; dan *Consumer Protection Competition and Fraud Repression of Cambodia* (CCF) telah menyertai bengkel berkenaan.
3. Dalam ucapan alu-aluannya, Pengerusi Suruhanajaya Persaingan Brunei Darussalam, Yang Berhormat Nik Hafimi binti Abdul Haadii, menekankan betapa pentingnya bengkel berkenaan dalam membantu agensi-agensi persaingan muda membina keupayaan masing-masing untuk melaksanakan dan menguatkuasakan

perundangan persaingan secara berkesan ke arah mencapai matlamat bagi meningkatkan kecekapan ekonomi dan kesejahteraan pengguna.

4. Dipimpin oleh Professor William Kovacic dari *George Washington University*, bengkel membincangkan lima tugas utama untuk dilaksanakan oleh agensi-agensi persaingan muda yang merangkumi pengukuhan rangka institusi; penetapan teras strategik dan pemilihan projek; penyampaian projek yang memberi impak; sosialisasi dan pemberigaaan yang berkesan; serta penilaian dan penambahbaikan secara kerap. Beliau turut memberi penekanan terhadap kepentingan bagi agensi-agensi persaingan muda untuk mempunyai asas yang tepat dalam memastikan pelaksanaan perundangan persaingan yang cekap dan efisien.
5. Peserta bengkel juga didedahkan dengan pengalaman awal *Philippines Competition Commission (PCC)* dalam melaksanakan perundangan persaingan. Pengerusi PCC, Tuan Arsenio Balisacan mengongsikan bahawa PCC memanfaatkan bantuan teknikal yang dihulurkan oleh rakan pembangunan dalam usaha bagi membina sumber PCC. Ini telah membolehkan PCC untuk meningkatkan dan membina kapasiti penguatkuasaan dengan mempelajari daripada pengalaman agensi-agensi persaingan yang lebih matang. Juga penting adalah untuk mendapatkan *buy-in* daripada pihak kerajaan ke arah mencapai objektif yang sama iaitu pasaran yang kompetitif.
6. Bengkel diakhiri dengan ucapan penutup daripada Tuan Ruben Maximiano, Pakar Persaingan Kanan OECD, dengan catatan positif untuk memperkukuhkan kerjasama di antara OECD dan ASEAN dalam hal ehwal persaingan. Program Persaingan OECD/KPC merupakan program yang membantu penguatkuasa perundangan persaingan untuk bertukar pengalaman dan meningkatkan keupayaan dalam perundangan dan dasar persaingan melalui platform seperti bengkel dan seminar.

\*\*\*\*\*

*Sekretariat Eksekutif Suruhanjaya Persaingan Brunei Darussalam  
Jabatan Persaingan dan Hal Ehwal Pengguna  
Jabatan Perancangan Ekonomi dan Statistik  
Kementerian Kewangan dan Ekonomi*

### **Suruhanjaya Persaingan Brunei Darussalam**

Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam telah memperkenankan penubuhan Suruhanjaya Persaingan Brunei Darussalam pada 1 Ogos 2017 sebagai sebuah badan bebas yang dimandatkan untuk mempromosi persaingan perniagaan di pasaran ekonomi Brunei Darussalam melalui penguatkuasaan Perintah Persaingan 2015.

Jabatan Persaingan dan Hal Ehwal Pengguna di Jabatan Perancangan Ekonomi dan Statistik, Kementerian Kewangan dan Ekonomi selaku Sekretariat Eksekutif kepada Suruhanjaya Persaingan adalah bertanggungjawab dalam melaksanakan fungsi Suruhanjaya Persaingan seperti pemberigaan, menerima aduan, mengkaji pasaran dan menjalankan siasatan.